

'Saya hanya ada RM500, yuran universiti RM3,000'

HAZELEN LIANA KAMARUDIN 23 Oktober 2024 02:20pm Masa membaca: 3 minit



Vivian (kiri) berkongsi kegembiraan bersama ibu, ayah dan adik-adiknya di hadapan rumah mereka di Kampung Pasir Parit, Chekok di Pasir Mas

PASIR MAS - Seorang pelajar lepasan Sijil Tinggi Persekolahan Malaysia (STPM), Vivian Koh Lik Ting, 20, dari Kampung Pasir Parit, Chekok di sini hanya mempunyai RM500 beberapa hari sebelum tarikh melaporkan diri ke Universiti Malaysia Kelantan (UMK).

"Saya sepatutnya daftar pada 1 Oktober lalu, tetapi duit tidak cukup. Yuran yang dikenakan oleh pihak universiti ialah RM3,000.



Vivian tidak dapat menahan sebak apabila PTPTN, UMK dan Yayasan Raja Shamri sudi membantunya menyambung pengajian.

"Disebabkan itu saya mengambil keputusan untuk tidak menyambung pengajian walaupun keputusan itu berat untuk dibuat namun hanya itu pilihan yang ada. Setiap malam saya menangis bila memikirkannya," katanya dalam nada sebak semasa ditemui pemberita pada Rabu.

Sebelum itu Vivian menerima kunjungan daripada Perbadanan Tabung Pendidikan Tinggi Nasional (PTPTN) yang diwakili oleh Ketua Eksekutif, Ahmad Dasuki Abdul Majid, Pengerusi Yayasan Raja Shamri, Raja Shamri Raja Husin dan Timbalan Naib Canselor (Hal Ehwal Akademik) UMK, Prof Dr Mohammad Ismail.



Vivian tidak dapat menahan sebak apabila mengingat kembali dia hanya mempunyai RM500 beberapa hari sebelum tarikh melaporan diri ke UMK.

Menurut anak sulung daripada lima beradik itu, ayahnya, Koh Boon Ting, 45, hanya bekerja mengambil upah mengecat kereta dengan berpendapatan sebanyak RM500 sebulan sahaja, manakala ibu, Yap Ai Chen, 39, seorang suri rumah.

Ujarnya, dia turut menabung hasil bekerja di sebuah kedai kasut di Tanah Merah selepas selesai menduduki peperiksaan STPM namun masih tidak cukup untuk menampung kos menyambung pengajian.



Raja Shamri (kiri) dan Ahmad Dasuki (kanan) turut membantu Vivian membawa kelengkapan untuk mendaftar ke UMK pada Rabu.

Dia memberitahu, dua adiknya masih bersekolah di tingkatan dua dan empat manakala seorang lagi bekerja di kedai gunting rambut dan yang bongsu berusia setahun.

"Memikirkan saya tidak berkemampuan untuk meneruskan pengajian Ijazah Sarjana Muda Keusahawanan Pelancongan, pilihan terbaik adalah menolak tawaran ini.



Ahmad Dasuki (dua dari kiri) menyampaikan sumbangan tanggungjawab sosial korporat (CSR) PTPTN berjumlah RM1,000 kepada Vivian.

"Tetapi pada Ahad lepas bagaikan bermimpi apabila dihubungi Yayasan Raja Shamri memaklumkan pihak PTPTN dan UMK akan membantu saya menyambung pengajian," katanya.

Menurut Vivian, dia sangat berterima kasih kepada semua pihak yang telah membantu merealisasikan impiannya untuk bergelar mahasiswa.



Vivian (tengah) mengadakan panggilan video bersama Pengerusi PTPTN, Norliza di hadapan rumahnya di Kampung Pasir Parit, Chekok di Pasir Mas

Dalam kunjungan tersebut, dia telah menerima sumbangan tanggungjawab sosial korporat (CSR) PTPTN berjumlah RM1,000 serta pengecualian yuran sepanjang pengajian oleh UMK dan beberapa bantuan lain dari Yayasan Raja Shamri.

Tidak ketinggalan, Pengerusi PTPTN, Datuk Seri Norliza Abdul Rahim turut mengadakan panggilan video bersama Vivian.